

Temu bual bersama
NINA FARZUIN MD SHAROM

BARU-baru ini Menteri Besar Kedah, Datuk Seri Mukhriz Mahathir membuat kenyataan bahawa beliau telah bersedia menggalas tugas lebih besar dalam pentadbiran kerajaan Persekutuan.

Namun beliau berkata, tugas yang dimaksudnya tidak semestinya sebagai Perdana Menteri.

Ikuti pandangan pengalisis politik dari Universiti Putra Malaysia (UPM), Prof Madya Dr Rusdi Omar mengenai perkara tersebut.

SINAR HARIAN: Sejauh mana kredibiliti Mukhriz untuk menggalas jawatan yang lebih besar dalam pentadbiran kerajaan persekutuan?

RUSDI: Jika dilihat dalam Bersatu, beliau antara pe-

mimpin yang matang dan berpelajaran. Walaupun ada kata-kata yang kurang menyenangkan terhadapnya sebagai Menteri Besar Kedah, tapi dengan pengalaman beliau ada sebagai Menteri Besar sebanyak dua kali, inilah masa sesuai untuk beliau berada dalam Kabinet di peringkat Persekutuan.

Bagi saya dari segi kredibiliti, beliau tidak ada masalah jika dibandingkan dengan yang lain. Beliau juga pemimpin pelapis masa depan negara selepas Datuk Seri Anwar Ibrahim dan Tan Sri Muhyiddin Yassin.

Jawatan yang sesuai diberikan kepada Mukhriz di peringkat Persekutuan?

RUSDI: Saya rasa jawatan yang sepatutnya diberikan kepada beliau ialah jawatan menteri Kabinet yang senior

setanding jawatan beliau sebagai Menteri Besar Kedah dan pengalaman terdahulu sebagai Timbalan Menteri Perdagangan Antarabangsa dan Industri. Boleh jadi sebagai Menteri Dalam Negeri sekiranya Muhyiddin dilantik sebagai Timbalan Perdana Menteri buat kali kedua.

Berkemungkinan juga beliau boleh memegang jawatan sebagai Timbalan Perdana Menteri sekiranya Muhyiddin memberi laluan kepadanya atas faktor kesihatan dan tidak mustahil gandingan Mukhriz dan Anwar akan berlaku.

Adakah pengaruh ayahnya, Tun Dr Mahathir Mohamad sebagai Perdana Menteri akan menjadi antara faktor Mukhriz diangkat di peringkat Persekutuan?

RUSDI: Ya sudah tentu. Ini juga sebagai satu kesinam-

bungan kepimpinan dan tidak mungkin ayahnya, Dr Mahathir akan membiarkan begitu sahaja tanpa memastikan beliau berada di kedudukan yang sesuai dalam barisan Kabinet. Sudah tentu pengaruh ayahnya mempengaruhi kedudukan Mukhriz.

Bagaimana penerimaan parti komponen Pakatan Harapan (PH) sekiranya Mukhriz diberi jawatan di peringkat Persekutuan?

RUSDI: Saya tidak nampak sebarang masalah akan timbul kerana kalau kita lihat hierarki dalam Bersatu, kedudukan Mukhriz adalah nombor dua selepas Muhyiddin. Jadi tidak ada alasan bahawa pelantikannya di peringkat Persekutuan akan menjadi beban kepada parti-parti komponen yang lain.

Dari segi kredibiliti, beliau tidak ada masalah untuk diangkat ke peringkat lebih tinggi tapi jangan terlampaui cepat, perlu ikut hierarki dalam parti masing-masing.



RUSDI